



## **PRESS SECRETARIAT**

**MINISTRY OF THE PRIME MINISTER & CABINET**

**Apia, Samoa**

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: [presssecretariat@samoa.ws](mailto:presssecretariat@samoa.ws)

**Press Release**

**6 Iuni 2008**

### **1. Tofiga o le Komesina o Fefaatauaiga i Niu Sila.**

Ua faamaonia e le Kapeneta le toe tofia o le Susuga Vaatuitui Apete Meredith i le tofiga o le Komesina o Fefaatauaiga i Aukilani, mo le tausaga e tasi, e afua mai i le Aso 30 Setema 2008, a e maea ia Setema 2009. O le faaaauaina mulimuli lenei o le Susuga ia Vaatuitui Apete Meredith i lenei tofiga.

O le Susuga ia Vaatuitui Apete Meredith na uluai tofia i lenei tofiga i le tausaga 2001, ma na toe tofia i lenei tofiga i le tausaga 2005 mo le tolu tausaga. O le masina o Setema 2008 e maea ai le tofiga o le Susuga ia Vaatuitui Apete Meredith, ma ua savali nei le fitu o tausaga talu ona avea o ia ma Komesina o Fefaatauaiga mo Samoa i Aukilani, Niu Sila.

### **2. Auai atu Sui o Samoa i le Lona Sefulu o Faaāliga o Aganuu a le Pasefika.**

Ua faamaonia e le Kapeneta le auai atu o Sui mai le Matagaluega o A'oga, Ta'aloga ma Aganuu, faatasi ai ma se aumalaga e 196 tagata i le Lona Sefulu o Faaāliga o Aganuu a le Pasefika, o le a faia i Amerika Samoa mai le Aso 20 Iulai – Aso 2 Aokuso 2008.

O le aumalaga e 196 tagata o le a fuafua i galuega poo vaega ua faatulagaina e limata'ita'iina ai le faaāliga. O nei fuafuaga ma vaega ua maea ona soalaupule e le Komiti Faafoe o le Faaāliga.

O le aumalaga ua fuafuaina e le Komiti o Tapenaga a Samoa e aofia ai le Minisita o A'oga, Ta'aloga, ma Aganuu, le Afioga To'omatata Alapati To'omata, le Minsita Lagolago o le Matagaluega, le Afioga Solamalemalo Keneti Sio, le Pule Sili o le Matagaluega, le Susuga Tautāpilimai Levaopolo T. Esera, ma le Pule Lagolago i le vaega o Aganuu, le Susuga Mose Fulu, o ia fo'i o le Ta'ita'i Malaga.

### **3. Talosaga mo le faatupeina e le SIFA o le 2008 Samoa Classic Ta'amilosaga o Tagapolo Pro Am.**

Ua faamaonia e le Kapeneta le fautuaga a le Komiti faatonu a le SIFA e avea latou ma Kamupani lagolago autū i le faatupeina o le ulua'i tauvaga ta polo ua ta'ua o le Samoa Classic 2008 o loo fuafua e faia i le Malae Tapolo i Faleata mai le Aso 23 – 26 Iulai 2008.

I le amataga o Me 2008, na ioeina ai e le Komiti o Tagapolo a Samoa le tuufaatasia o se taamilosaga tapolo faapolofesa ma le au tapolo faavaomalo e taua o le Samoa Classic 2008. I le maea ai o lea faaiuga, na talosaga aloaia ai loa le SIFA ina ia avea latou ma kamupani lagolago autu o lenei fuafuaga.

O le unaia o lenei faamoemoe e faaigoaina ai le taamilosaga o le SIFA Samoa Classic 2008, ma o le a faatupeina uma foi e le SIFA le aofaiga atoa o le a faaagaga mo faailoga a i latou e tapolo faapolofesa. Ma o lenei talosaga ua maea ona talia aloaia e le Komiti o Faatonu e faavae i luga o se fautuaga mai le Pulega

O le faamoemoe maualuga o le SIFA i lenei fuafuaga o le faalauiloaina atili lea o le latou Kamupani i taamilosaga tagapolo faavaomalo i Ausetalia faapea ma Niu Sila. E le gata i lea, e tele foi se fesoasoani mo tagata Samoa e ala mai i auala e ati a'e ai le taaloga i totonu o Samoa, faapea foi ma tupe e ono maua mai ai.

#### **4. Laina/Uaea o Feso'otaiga i Lalo o le Sami.**

Ua faamaonia e le Kapeneta le lipoti mai le Matagaluega o Fesootaiga ma Faamatalaga Tekonolosi e fia faailoa atu le tulaga ua i ai nei feutagaiga ma le Kamupani o le ASH Cable e pei ona faatonuina.

Ua tuuina mai se ata o le maliega i le va o le ASHC ma le Malo o Samoa faapea le SamoaTel mo le fa'ao'oina mai o le submarine cable i Apia, i le maea ai o feutagaiga. Ua tuuina atu lenei maliega i le Ofisa o le Loia Sili mo sana iloiloga i ni a'afiaga mo le Malo. Ua uma foi ona vaai i ai loia a le SamoaTel ma ua fai foi suiga e pei ona talanoaina ma le Kamupani o le ASHC.

Ua faailoa mai e le ASHC e lua cable o loo fuafua e fausia. O le tasi o cable o le a fausia lea i le va o Hawaii ma Amerika Samoa, ma le lona lua, e fausia lea i le va o Amerika Samoa ma Samoa. O le faamoemoe e oo atu ia Ianuari/Fepuari 2009 ua maea ona faataatia cables nei aua le faaleleia atili o fesootaiga a Samoa ma atunuu i fafo.